

Efterskolit pillugit Inatsisartut inatsisaata allanngortinnissaanut siunnersuut

(Paarlaasseqatigiittarnermut tapiissut)

(Ilinniartitaanermut, Ilisimatusarnermut Nunanullu Avannarlernut Suleqateqarnermut Naalakkersuisoq)

Saqqummiussissut

(Ilinniartitaanermut, Ilisimatusarnermut Nunanullu Avannarlernut Suleqateqarnermut Naalakkersuisoq)

Siullermeerneqarnera

Matumuuna efterskolit pillugit Inatsisartut inatsisaata allanngortinnissaanut Inatsisartut inatsisissaatut siunnersuut Naalakkersuisut sinnerlugit saqqummiutissavara.

Inatsisartut 2010-mi ukiakkut katersuunnerminni oqaluuserisassani immikkoortoq 68 aalajangiiffigisassatut siunnersuut akuersissutigaaq inuusuttut amerlanerit nunanut allanut oqaatsinik allanik ilinniarnissamik periarfissinneqarnissaat Naalakkersuisut sulissutigissagaat.

Uani siunnersuummi saqqummiunneqartumi paarlaasseqatigiittarnermut tapiisinnaaneq efterskolit pillugit inatsimmut ilanngunneqassaaq, aamma aalajangersarneqassaaq tapiissutit tamarmiusut ukiut tamaasa Aningaasanut Inatsimmi inissinneqartarnissaat.

Aammattaaq piginnaatitsissuteqartarnermut aalajangersagaliisoqarsimavoq, tassani tapiissutinik tunniussisarnermut, tapiissutit annertussusaannut, isertitaqqortussuseq naapertorlugu akiliuteqartalersinnaanermut, qinnuteqartarnermut kiisalu naammagittaalliuuteqartarnermut periusissanut malittarisassanik aalajngersaasinnaanermut Naalakkersuisut piginnaatillugit. Tassunga atatillugu nalunaarusiortoqassasoq ilimagineqarpoq, taannalu inatsisip allanngornera ilutigalugu atortuulersinneqarumaarpoq.

Inatsisip qulequtaata allanngortinnissaanut siunnersuusiortoqarnissaa tulluussorineqarpoq, taamaalilluni takuneqarsinnaaniassamat efterskolit aamma paarlaasseqatigiinnernut tapissutit pineqartut. Aammattaaq inatsimmi paallaasseqatigiinnerup qanoq paasineqarsinnaanerata nassuiarneqarnissaa tulluussorineqarpoq.

Tulluussorineqarportaaq efterskolertarnermi tapiissutit piginnaatitsissuteqartarnermut aalajangersakkami erseqqissarneqassasut isertitaqqortussuseq naapertorlugu malittarisassat aalajangersakkat naapertorlugit akiliuteqartoqarsinnaasoq. Periarfissap taassuma atornerqarnissaa maannamut pilersaarutaanngilaq, taamaaliorqartinnagu efterskolertarnerup tamarmi nalinginnaasumik Naalakkersuisunit nalilerneqaaqqaarusunneqarmat.

Oqaaseqaatit taakku atorlugit siunnersuut Inatsisartunit kajumittumik suliarineqarnissaa kissaatigaara.